

**I. ATALA****BIZKAIKO LURRALDE HISTORIKOKO FORU ADMINISTRAZIOA****Bizkaiko Foru Aldundia****Euskara eta Kultura Saila**

Bizkaiko Foru Aldundiaren 56/2019 FORU DEKRETUA, maiatzaren 21ekoa; honen bidez, Bizkaiko Lurralde Historikoan 2019ko ekitaldian aisia eta astialdiko koordinazio-egiturak mantentzeko diru-laguntza foralen oinarri arautzaileak eta deialdia onesten dira.

Euskal Autonomia Erkidego Osorako Erakundeen eta Lurralde Historikoetako Foru Erakundeen arteko Harremani buruzko 1983ko azaroaren 25eko 27/1983 Legeak bere 7.c.2) artikulua araber, lurralde historikoei dagokie, nori bere lurraldearen barruan, Erkidego Osorako Erakundeen legeria betearaztea arlo hauetan: erkidegoaren garapena; emakumea; haur, gazte eta adinekoentzako politika, eta aisialdia. Nolanahi ere, Euskal Autonomia Erkidegoko erakunde erkideek ere zuzenean jardun dezakete arloetan.

Bestalde, Bizkaiko Foru Aldundiko Euskara eta Kultura Sailaren Egitura Organikoari buruzko Erregelamendua onesten duen Bizkaiko Foru Aldundiaren martxoaren 6ko 22/2018 Foru Dekretuaren araber, sail horren eskumenekoa da aisia eta astialdiko eremuan lanean diharduten erakundeak sustatzea eta laguntzea, bai eta erakunde horiek egiten dituzten programak eta jarduerak ere.

Horregatik, eskumen-titulu horiek direla bide, Bizkaiko Foru Aldundiak, foru-dekretu honen bidez, elkarrekin gazteen kultura parte-hartzailea eta gazte-elkarrekin sustatu nahi ditu, Bizkaiko Lurralde Historikoko aisia eta astialdiko koordinazio-egiturak mantentzeko diru-laguntzen bidez.

Foru-dekretu honek bete egiten ditu erregulazio onaren printzipioak; printzipio horiek Administrazio Publikoen Administrazio Prozedura Erkidearen 2015eko urriaren 1eko 39/2015 Legean aurrez ikusten dira eta Bizkaiko Foru Aldundiaren 2017ko urtarrilaren 17ko 2/2017 Foru Dekretuaren 3. artikuluan jasotzen dira (dekretu horren bidez, Bizkaiko Foru Aldundian xedapen orokorrak egiteko prozedura arautzen da).

Foru-dekretu horretan xedatutakoa kontuan hartuta, txosten hauek eman dira foru dekretu hau egin denean:

1. Proiektua sustatu duen sailaren txosten juridikoa.
2. Generoaren eraginaren aurretiazko ebaluazioari buruzko txostena.
3. Kontrol ekonomikoari buruzko txostena.
4. Legezketasunari buruzko txostena.

Bizkaiko Kondaira Lurraldeko Foru Erakundeen Hautapen, Antolaketa, Erregimen eta Funtzionamenduari buruzko 1987ko otsailaren 13ko 3/1987 Foru Arauaren 39.k) artikulua ezartzen du foru diputatuen eskumena dela, besteak beste, Foru Aldundiari proposamenak aurkeztea haien sailatutako gaiari buruzko foru dekretuen proiektuak onar ditzan. Bestalde, Foru Administrazioak ematen dituen diru-laguntzen araubide juridiko orokorra arautzen duen 2005eko maiatzaren 31ko 5/2005 Foru Arauaren 16.1 artikulua ahalmena ematen dio Bizkaiko Foru Aldundiari diru-laguntzen emakida arautuko duten oinarriak onesteko. Eta, azkenik, Diru-laguntzen Erregelamendua onesten duen Bizkaiko Foru Aldundiaren 2010eko martxoaren 23ko 34/2010 Foru Dekretuaren 41.1 artikulua aukera ematen du diru-laguntzen oinarri arautzaileak eta deialdia batera izapidetzeko, eta ezartzen du Bizkaiko Foru Aldundiaren Gobernu Kontseiluari dagokiola onartzea egintza bakarrean.

Hori dela bide, Euskara eta Kultura Saileko foru-diputatuaren ekimenez, eta aurrez Bizkaiko Foru Aldundiak 2019ko maiatzaren 21eko bileran aztertutik, honako hau,



XEDATZEN DUT:

Artikulu Bakarra.—Foru Aldundiaren diru-laguntza batzuen oinarriak eta deialdi publikoa onartzea

Bizkaiko Lurralde Historikoan 2019ko ekitaldian aisia eta astialdiko koordinazio-egiturak mantentzeko diru-laguntza foralen oinarri arautzaileak eta deialdia onesten dira.

I. TITULUA

XEDAPEN OROKORRAK**1. oinarria.—Diru-laguntzaren xedea**

1. Foru-dekretu honekin bat, jarduera hauek jaso dezakete diru-laguntza: Bizkaiko Lurralde Historikoko koordinazio-egitarauen mantenu eta funtzionamendua, eta gazteen aisia eta astialdian lanean diharduten irabazi-asmorik gabeko erakundeei emandako aholkularitza eta laguntza, 2019ko ekitaldian.

2. Foru dekretu honen aplikazio-eremutik kanpo geratzen dira honako hauek:

- a) Kirol-programak.
- b) Edozein motatako obraren finantziazioa.
- c) Entretenezeko baino ez diren bidaiak.
- d) Helburu nagusizat emakumeak eta genero berdintasuna sustatzea duten proiektuak.
- e) Sexuaren araberako diskriminazioa eragiten duten proiektuak.

3. Diruz laguntzeko gastutat joko dira batere zalantzarik gabe lagundutako jardueraren izaerarekin bat datozenak, guztiz beharrezkoak direnak eta ezarritako epearen barruan egiten direnak, baina diru-laguntza jaso dezaketen gastuen eskuraketa-kostua ezin da inola ere izan merkatuko balioa baino handiagoa.

Hain zuzen, honako hauek ez dira diruz lagundu daitezkeen gastuak:

- a) Gazteen aisia eta astialdian lanean diharduten irabazi-asmorik gabeko erakundeetako egituren koordinazio- eta funtzionamendu-zereginetan eta erakunde horrienganako aholkularitza eta laguntza-zereginetan diharduten langileen gastuak.
- b) Koordinazio, aholkularitza eta laguntza-zereginei zuzen-zuzenean loturiko gastu arruntak.

Honako hauek, berriz, ez dira diruz lagundu daitezkeen gastuak:

- a) Ekipo-ondasunak erostea, baldin eta haien amortizazioa luzeagoa bada foru dekretu honetan jasotzen diren jarduerak egiteko epea baino.
- b) Banku-kontuen zorrak sortutako interesak.
- c) Korrituak, errekaratuak, administrazio-zehapenak eta zigor-zehapenak.
- d) Prozedura judizialen gastuak.
- e) BEZa, baldin eta berreskuratu edo konpentsatu egin badaiteke. Kasu horretan, BEZik gabe agertu behar dira gastuen zenbatekoak, hala eskabidean agertzen den aurrekontuan, nola diru-laguntzaren justifikazioarekin batera aurkeztuko den gauzatutako aurrekontuan.
- f) Oro har, maiatzaren 5/2005 Foru Arauaren 29. artikuluaekin bat etorrira, beren-beregi kanpo utzitakoak.

4. Foru-dekretu honen helburua erakunde eskatzaileen ekintzak lagundu eta osatzea da; horregatik ez dira inoiz finantzatuko jardueraren ondoriozko gastu guztiak.

2. oinarria.—Erakunde onuradunak

1. Gazteen aisiaren eta astialdiaren arloan diharduten erakundeak koordinatzen dituzten edo halako erakundeei aholkularitza edo laguntza ematen dieten Bizkaiko Lurralde Historikoko erakundeak izan daitezke foru-dekretu honek araututako dirulaguntzen



onuradun, maiatzaren 31ko 5/2005 Foru Arauaren 12. artikuluan ezarritako egoeretako batean ez badaude eta honako betekizun hauek betetzen badituzte:

- a) Egoitza soziala edo ordezkaritza iraunkorra Bizkaiko Lurralde Historikoan izatea.
 - b) Irabazi-asmorik ez izatea.
 - c) Emakumeen eta gizonen artean benetako berdintasuna lortzeko jarduketan garapenean esperientzia eta ibilbidea egiaztatzea, Emakumeen eta Gizonen Berdintasunerako ekainaren 20ko 4/2018 Foru Arauaren 43. artikuluekin bat etorrita, foru-dekretu honen 6. oinarrian ezartzen den moduan.
2. Foru dekretu honen aplikazio-eremutik kanpo daude erakunde hauek:
- a) Kirol-klubak eta -elkartek.
 - b) Beren estatutuetan ezarritakoaren arabera talde sozial berezien gizarte-integrazioa eta talde politikoak eta alderdi politikoak xede duten erakundeak.
 - c) Sexua dela-eta inor baztertzeagatik administrazio zehapena edo zehapen penala jaso duten erakundeak eta Emakumeen eta Gizonen Berdintasunerako ekainaren 20ko 4/2018 Foru Araua dela bide debeku hori ezarri zaienak, dagokien zehapena indarrean dagoen bitartean.

II. TITULUA

ARAUBIDE JURIDIKOA

3. oinarria. — Aplikatu beharreko araudia

Foru-dekretu honetan jasota ez dagoenerako, honako hauek ezarriko dira: Foru Administrazioak ematen dituen diru-laguntzen araubide juridiko orokorra arautzen duen 2005eko maiatzaren 31ko 5/2005 Foru Araua, 2010eko martxoaren 23ko 34/2010 Foru Dekretuaren bidez onetsitako Diru-laguntzen Erregelamendua, eta, haien guztien osagarri moduan, Administrazioen Publikoen Administrazio Prozedura Erkidearen 2015eko urriaren 1eko 39/2015 Legea, Sektore Publikoaren Araubide Juridikoaren 2015eko urriaren 1eko 40/2015 Legea eta beste edozein arau xedapen, duen izaeragatik ezartzeko modukoa baldin bada.

Bizkaiko Gardentasunari buruzko otsailaren 17ko 1/2016 Foru Araua erakunde pribatu hauei aplikatuko zaie: aurrekontu-ekitaldian zehar Bizkaiko Foru Aldundiaren 100.000 euroko edo gehiagoko laguntzak edo dirulaguntzak jasotzen dituztenei edo haien urteko diru-sarreraren %40 Aldundiaren laguntzetatik edo diru-laguntzetatik badator, betiere gutxienez 5.000 euro badira.

4. oinarria. — Arau-haustek eta zehapenak

Arau-hauste eta zehapenei dagokienez, Foru Administrazioak ematen dituen diru-laguntzen araubide juridiko orokorra arautzen duen 2005eko maiatzaren 31ko 5/2005 Foru Arauaren IV. tituluaren xedatutakoa ezarriko da, bai eta arau hori garatzen duen erregelamenduaren IV. tituluaren ere.

III. TITULUA

PROZEDURA

5. oinarria. — Eskabideak aurkezteko lekua eta epea

1. Administrazio Publikoen Administrazio Prozedura Erkidearen urriaren 1eko 39/2015 Legearen 14.2.a) artikuluen arabera, diru-laguntzetarako eskabideak Bizkaiko Foru Aldundiaren egoitza elektronikoaren bidez aurkeztu beharko dira (<https://www.ebizkaia.eus/es/hasiera>).

2. Eskabideak aurkezteko epea foru-dekretua Bizkaiko Aldizkari Ofizialean argitaratu eta biharamunetik 2019ko ekainaren 14ra arte izango da, egun biak barne.

**6. oinarria. — Aurkeztu behar diren agiriak**

1. Eskabideak aurkezteko, Bizkaiko Foru Aldundiaren egoitza elektronikoa bete eta aurkezteko dauden eredu espezifikoak erabili behar dira (<https://www.ebizkaia.eus/eu/hasiera>), 39/2015 Legearen 66.6 artikuluan ezarritakoarekin bat.

2. Dokumentazio orokor eta espezifiko hau erantsi beharko da:

- a) Erakunde eskatzailearen IFZren kopia.
- b) Banku-helbideratzearen fitxa, behar bezala beteta.
- c) Erakunde eskatzailearen estatutuen edo eraketa-eskrituren kopia.
- d) Dagokion erregistroan inskribatuta egotearen ziurtagiria.

Aurreko lau letretan aipatutako dokumentazioa ez da aurkeztu beharko baldin eta aurretiaz aurkeztu bada eta ez bada aldaketarik egon azken hiru urteetan.

- e) Pertsona fisiko batek NAN elektronikoa erabiltzen badu eskabidea egiteko, jarduteko ordezkaritza-ahalordea aurkeztu beharko du.
- f) Koordinazio-egituraren kide anitzeko gobernu-organoko kideen kopurua jasotzen duen txostena; sexuaren arabera bereizi behar dira kideak, eta bereziki adierazi behar da zer generokoa den presidentea. Gobernu-organoko idazkariak edo idazkari-lanetan diharduenak sinatuko du txostena.
- g) Erakunde eskatzailearen proiektua, funtzionamendu-programak eta urteko ekitaldian deialdi honen xedeari lotuta egingo dituen jarduerak zehaztuta.
- h) Koordinazio-egitura sartuta dauden erakundeen edo/eta 2018an aholkularitza-edo laguntza-zerbitzua eman zaien erakundeen zerrenda; erakunde horiek osatzen dituzten pertsonen kopurua eta erakundeon sozietate-egoitzako udalerrria adierazi beharko dira.
- i) Erakunde eskatzaileak kontratatutako langileen zerrenda eta langileon kontratatuen kopiak.
- j) Euskararen erabilerari buruzko txostena eta proiektua garatzen den bitartean erabilera hori sustatzeko neurriak.
- k) Emakume eta gizonen berdintasuna lortzeko jarduketan arloan duten esperientzia eta ibilbidea egiaztatzeko, agiri hauetakoren bat:
 - 1) Koordinazio-egiturak zer ibilbide egin duen eta zer esperientzia duen emakume eta gizonen arteko berdintasunaren arlo espezifikoan, azken hiru urteetan egin dituen jarduketa eta lan nagusiak adierazita.

Entitate sortu berria bada, emakume eta gizonen arteko berdintasunaren arlo espezifikoan jarduera eta lanak egiteko konpromisoa.
 - 2) Langileek generoaren arloan dituzten tituluak, prestakuntza eta curriculumak.
 - 3) Emakume eta gizonen arteko berdintasuna bultzatzea erakundearen helburua dela jasotzen duen erakundearen sorrera-eskrituraren edo estatutuen fotokopia.
 - 4) Berdintasunaren arloko enpresa-egiaztagiri edo -bereizgarri bat, edo emakumeen eta gizonen aukera-berdintasunean entitate laguntzailea izatearena, edo antzeko agiri ofizialen bat.
 - 5) Emakumeen eta gizonen berdintasunerako plana eta/edo familia, lana eta bizitza pertsonala uztartzeko neurriena.
 - 6) Erakundearen zuzendaritza batzorde edo organoko kideen %40 gutxienez emakumeak direla jasotzen duen ziurtagiria.

3. Bizkaiko Gardentasunari buruzko otsailaren 17ko 1/2016 Foru Arauaren 2. artikulua aintzat harturik, adierazi beharko da zein diren erakundeak urtean aurreikusten dituen diru-sarrerak guztiak.

4. Bizkaiko Foru Aldundiak egiaztatu egingo ditu eskabidea sinatzen duen pertsonaren identifikazio-datuak.



Halaber, Bizkaiko Foru Aldundiak eskatzailearen banku-kontuaren titulartasun-datuak egiaztatuko ditu, betiere eskatzaileek berariaz uko egiten ez badiote horri.

Datu pertsonalak eskuratzeko modua bat etorriko da Datu pertsonalen tratamenduari eta datu horien zirkulazio askeari dagokienez pertsona fisikoak babesteari buruzko Europako Parlamentuaren eta Kontseiluaren 2016ko apirilaren 27ko 2016/679 Erregelamenduan (EB) eta erregelamendu hori garatzen duen araudian ezarritakoarekin bat, bai eta Datu pertsonalak babestu eta eskubide digitalak bermatzeko abenduaren 5eko 3/2018 Lege Organikoan ezarritakoarekin bat etorritz.

5. Halaber, eskaera hau sinatuta baimena ematen zaio Euskara eta Kulturako Foru Sailari Ogasunaren eta Gizarte Segurantzaren ziurtagiriak eskatzeko, Diru-laguntzei buruzko maiatzaren 31ko 5/2005 Foru Arauaren 21.3 artikuluan ezarritako ondorioetarako.

7. oinarria. — Eskabideak zuzentzea edo hobetzea

1. Eskabideak behar bezala beteta ez badaude, edo eskabidearekin batera foru-dekretu honetan eskatutako agirietakoren bat aurkeztu ez bada, errekerimendua egingo zaio erakunde eskatzaileari, hamar (10) egun balioduneko epearen barruan akatsa zuzendu dezan edo beharrezko agiriak aurkez ditzan. Era berean, ohartaraziko zaio ezen, hala egiten ez badu, eskaeran atzera egin duela ulertuko dela eta, behin ebazpena emanda, eskaera artxibatu egingo dela.

2. Edonola ere, Kultur Ekintzako Zerbitzuko Gizarte eta Hezkuntza Programen Atalak aurkezten diren eskabideak behar bezala ulertzeko eta ebaluatzeko beharrezkotzat jotzen duen informazio osagarri guztia eskatu ahal izango du.

8. oinarria. — Diru-laguntzak emateko araubidea

1. Foru Administrazioak ematen dituen diru-laguntzen araubide juridiko orokorra arautzen duen maiatzaren 31ko 5/2005 Foru Arauaren 20. artikulua 1. zenbakiaren bat, diru-laguntzak emateko ohiko prozedura norgehiagoka araubidea da.

Baina, zenbaki horren hirugarren paragrafoan xedatutakoarekin bat, diru-laguntzetarako dagoen zenbateko osoa diru-laguntzaren onuradunen artean hainbatu ahal izango da, salbuespenez.

Kontuan hartuta dekretuaren helburua dela koordinazio-egituren mantentzea sustatzea eta e aholkularitza eta laguntza ematea gazteen aisiaren eta astialdiaren arloan diharduten irabazi-asmorik gabeko erakunde horiei, deialdi honetako diru-laguntzak emateko araubideak salbuespeneko hainbanaketa-sistema izango da.

Horretarako, puntuak emango zaizkio aurkeztutako eskabide bakoitzari, eta 9. oinarriaren lehen zenbakian ezarritako gutxienezko puntuaziora heltzen diren eskabide guztien puntuen batura egingo da. Aurrekontu-kreditua, berriz, eskabide horiek lortutako puntu guztiez zaituko da. Aurretik, balio ekonomiko bat emango da puntuko.

Eskabide bakoitzari emango zaion diru-laguntza kalkulatzeko, biderkatu egingo dira lortutako puntu guztiak eta ezarritako puntuaren balio ekonomikoa, araudi honen 9. oinarriko 2. zenbakian zehaztutako mugekin.

9. oinarria. — Balorazio-irizpideak

1. Diru-laguntzen zenbatekoa zehazteko, beheko irizpideak eta haien haztapena hartuko dira kontuan. Gehienez, 100 puntu emango dira, honela banatuta:

- a) Erakunde kopurua: koordinazio-egituren dauden erakundeen kopurua zenbat eta handiagoa izan, edo, bestela, erakunde eskatzaileak 2018an aholkularitza- eta laguntza-zerbitzuak eman zaizkien erakundeen kopurua zenbat eta handiagoa izan, orduan eta puntu gehiago emango dira; 25 puntu gehienez, honela banatuta:
 - 0-5 erakunde: 5 puntu.
 - 6-10 erakunde: 10 puntu.
 - 11-15 erakunde: 15 puntu.
 - 6-20 erakunde: 20 puntu.
 - 20 erakunde baino gehiago: 25 puntu.



- b) Erakunde eskatzailearen funtzionamendu-urteak: 10 puntu, gehienez. Puntuak honela banatuko dira:
- 0 urtetik 10 urtera: 5 puntu.
 - 10 urtetik gora: 10 puntu
- c) Giza baliabideak, hau da, kontratatuko langileak; 20 puntu emango dira, gehienez. Honela jokatuko da puntuazioa kalkulatzeko: langile kontratatu gehien dituen egiturari 20 puntu emango zaizkio; gainerakoei modu proportzionalean emango zaizkie puntuak.
- Lortutako puntuazioan zenbaki hamartarrak egonez gero, zenbaki oso hurbilenera biribilduko da puntuazioa, eta, distantziakidetasuna suertatzen bada, handienera.
- d) Proiektuaren kalitatea eta interesa: 20 puntu, gehienez. Honela baloratuko da:
- 1) Baxua: 10 puntu.
 - 2) Ertaina: 15 puntu.
 - 3) Altua: 20 puntu.
- e) Proiektuaren finantzaketa-maila. Kontuan hartuko da ea erakundeek ahalegina egin duten proiektuaren bideragarritasuna indartzeko balioko duen kanpoko finantzaketa lortzeko.
- Finantzaketa-maila honela kalkulaturako ratioak adieraziko du: aurrekontu banakatuan agertzen diren sarreraren (sarrerok hauek dira: diru-laguntza publikoak —deialdi honetan eskatutako kopurua kenduta—, erakunde pribatuaren ekarpenak, jardueraren berezko sarrerak eta beste sarrera batzuk) batura zati aurrekontuko sarrera guztien batura. Puntuazioa: 15 puntu, gehienez.
- Puntuazioa kalkulatzeko, berriz, finantzaketa-maila handiena duen proiektuari 15 puntu emango zaizkio, eta, ondoren, hiruko erregela erabiliko da puntuak banatzeko.
- Lortutako puntuazioan zenbaki hamartarrak egonez gero, zenbaki oso hurbilenera biribilduko da puntuazioa, eta, distantziakidetasuna suertatzen bada, handienera.
- f) Euskara: proiektuaren eremu ezberdinetako euskararen erabilera ebaluatuko da, eta 10 puntu emango dira gehienez. Puntuak honela banatuko dira:
- 1) Proiektuaren garapenean komunikatzeko euskara erabiltzen bada: 5 puntu, gehienez.
 - 2) Proiektua eta zabalkunde-materialak euskaraz egiten badira: 3 puntu, gehienez.
 - 3) Proiektuan euskararen erabilera sustatzeko neurriak sartzen badira: 2 puntu.

Gutxienez 40 puntu lortzen ez dituzten proiektuek ez dute diru-laguntzarik jasoko.

2. Foru-dekretu honen babesean gehienez eman daitekeen zenbatekoa ezin izango da izan hamazortzi mila (18.000) euro baino gehiago, ez ezin izango du gainditu diruz lagundu daitezkeen jardueren aurrekontu osoaren ehuneko berrogeita hamar (%50). Halaber, ezin izango du gainditu erakundeak eskatutako kopurua.

Jardueraren aurrekontutik kenduko dira deialdiaren helburuarekin zuzeneko loturarik ez duten gastuak.

3. Geldikinik badago, puntuaren balioa berriro kalkulatu da, diruz lagundu daitezkeen gehieneko kopurua lortu ez duten proiektuen artean.

10. oinarria. — Aholkularitza

Euskara eta Kultura Saileko Kultur Ekintzako Zerbitzuko Gizarte eta Hezkuntza Programen Atalak behar den laguntza tekniko edo aholkularitza eskainiko ditu foru-dekretu hau dela-eta sortutako zalantza edo kontsulta guztiak argitzeko, web-orri honen bidez: <http://www.bizkaia.eus/laguntzaileaisialdi>

**11. oinarria. — Ebazpena**

1. Foru Administrazioak ematen dituen diru-laguntzen araubide juridiko orokorra arautzen duen maiatzaren 31ko 5/2005 Foru Arauaren 22.4. artikuluan xedatutakoa bezela, deialdi honetan, interesdunei ez zaie, lehenbizi behin-behineko ebazpen-proposamena eman, eta, gero, entzunaldiaren izapidea eskainiko, zeren prozeduran interesdunek ekarri dituzten egitateak, alegazioak eta frogak besterik ez baitira jaso eta kontuan hartuko.

2. Deialdia ebatzi aurretik, Kultur Ekintzako Zerbitzuko Gizarte eta Hezkuntza Programen Atalak egiaztatuko du ea eskatzaileek egunean dituzten zerga-betebeharrak eta Gizarte Segurantzari dagozkionak.

Aurreko guztia egiaztatu ondoren ikusten bada eskatzailearen batek betebeharrak horietako edozein ez duela betetzen, errekerimendua egingo zaio hamar (10) eguneko epean egoera hori erregulariza dezan, eta ohartaraziko zaio ezen, hala egiten ez badu, eskaeran atzera egin duela ulertuko dela.

3. Ebazpena emateko eta jakinarazteko epea sei (6) hilabete izango da, gehienez, eskabideak aurkezteko epea amaitzen denetik zenbatuta.

Euskara eta Kultura Saileko foru diputatuak emango du ebazpena, Kulturako zuzendari nagusiaren proposamena kontuan hartuta, Kultur Ekintzako Zerbitzuak txostena egin ondoren. Epe hori eskabideari buruzko beren-beregiko ebazpenik eman eta jakinarazi gabe igarotzen bada, eskabidea ezetsizat joko da; hala ere, geroago beren-beregiko ebazpena eman ahal izango da.

4. Deialdi hau ebazteko ematen den foru-agindua deialdi publiko honetarako eskabidea aurkeztu duten erakunde interesdunei jakinaraziko zaie; horretarako, iragarkia argitaratuko da Bizkaiko Aldizkari Ofizialean. Bizkaiko Foru Aldundiaren egoitza elektronikoa agertzeko sistemaren bidez ere jakinaraziko zaie.

Foru agindu horretan berariaz jasoko da ebazpenak administrazio-bidea agortzen duela eta interesdunak aukerako berraztertze errekurtsoa jar dezakeela foru agindu horren aurka, Euskara eta Kulturako foru diputatuaren aurrean, hilabeteko (1) epean, edo administrazioarekiko auzi-errekurtsoa, bi (2) hilabeteko epearen barruan; epeok jakinarazpena egin eta biharamunean hasiko dira zenbatzen.

12. oinarria. — Beste diru-laguntza batzuekiko bateragarritasuna

1. Foru-dekretu honetako diru-laguntzak ez dira bateragarriak Bizkaiko Foru Aldundiak helburu bererako emandako beste diru-laguntza batzuekin.

Hala ere, bateragarria izango da helburu bererako beste administrazio batzuek edota erakunde publiko zein pribatuak (estatukoak izan nahiz nazioartekoak) emandako diru-laguntza edo laguntzekin.

2. Diru-laguntza emateko kontuan hartu diren inguruabarretakoren bat aldatzen bada, eta betiere aldi berean udalerrietako, autonomia-erkidegoetako, estatuko edo nazioarteko beste administrazio edo erakunde publiko batek emandako beste diru-laguntza, laguntza, sarrera edo baliabideren bat lortzen bada, gerta liteke diru-laguntza emateko ebazpena aldatzea, zeren foru dekretu honen bitartez araututako diru-laguntzen zenbatekoa, bakarrik zein beste diru-laguntza edo laguntza batzuekin bat eginda (finantzaketa propioa barne), inolaz ere ezin baita izan onuradunak egin beharreko jardueraren kostua baino handiagoa.

IV. TITULUA**DIRU-LAGUNTZAK KUDEATZEA ETA JUSTIFIKATZEA****13. oinarria. — Diru-laguntza ordaintzea**

1. Diru-laguntza emateko foru agindua Bizkaiko Aldizkari Ofizialean argitaratu eta ondorengo hamar egun baliodunetan erakunde onuradunak ez badio uko egiten beren beregi egoitza agertzeko sistemaren bidez, diru-laguntza onartu duela ulertuko da.



Diru-laguntza eman dela Bizkaiko Aldizkari Ofizialean argitaratu ondoren, 10 egun baliodun igaro ondoren, Kultur Ekintzako Zerbitzuak diru-laguntzaren zenbatekoaren ordainketa izapidetuko du Ogasun eta Finantzen Foru Sailean, eta erakunde onuradunei ez zaie horretarako inolako bermerik eskatuko.

2. Diru-laguntza ordaindu baino lehen, onuradunek zerga-betebeharrak eta Gizarte Segurantzarekikoak egunean dituztela egiaztatuko da.

Hori egiaztatu ondoren ikusten bada erakunde onuradunen batek betebeharrak horietako edozein ez duela betetzen, errekerimendua egingo zaio 10 eguneko epean egoera hori erregulariza dezan, eta ohartaraziko zaio ezen, horrela egiten ez badu, emandako diru-laguntza jasotzeko eskubidea galduko duela.

14. oinarria. — Diru-laguntza onuradunaren borondatez itzultzea

1. 2010eko martxoaren 23ko 34/2010 Foru Dekretuaren 76. artikuluan xedatutakoaren arabera (dekretu horren bidez, Diru-laguntzen Erregelamendua onesten da, 2005eko maiatzaren 31ko 5/2005 Foru Araua garatzen duena), onuradunak bere ekimenez itzuli ahal izango du Bizkaiko Foru Aldundiak emandako diru-laguntza, foru-erakundeak aurretik eskatu gabe.

Halakoetan, Bizkaiko Foru Aldundiak diru-laguntza benetan itzultzen den arte sortutako berandutze-interesak kalkulatuko ditu, aipatutako 76. artikuluan eta 5/2005 Foru Arauaren 34. artikuluan ezarritakoarekin bat etorrira.

2. Erakunde onuradunak ordainketa-gutun bat erabili behar du diru-laguntza forala bere ekimenez itzultzeko. Ordainketa-gutun hori Kultur Ekintzako Zerbitzuaren bulegoetan izapidetuko da, onuradunak eskatuta. Ordainketa-gutunean honako hauek adierazi behar dira: itzuli beharreko zenbatekoa (printzipala eta berandutze-interesak), ereduaren kodea eta diru-laguntza itzultzeko arrazoia. Hori guztia itzuli behar den diru-laguntzari erreferentzia eginez adieraziko da.

3. Diru-laguntzaren onuradunak finantza-erakunde batean ordainketa egin ondoren, ordainketaren kopia edo diru-sarreraren frogagiria bidali beharko dio Euskara eta Kultura Saileko Kultur Ekintzako Zerbituari.

15. oinarria. — Justifikazioa egiteko epea eta era

Foru-dekretu honen bitartez araututako diru-laguntzen erakunde onuradunek honako konpromiso hauek bete beharko dituzte:

1. Diruz lagundutako proiektua 2019an zehar egitea.
2. Bizkaiko Foru Aldundiaren martxoaren 23ko 34/2010 Foru Dekretuaren bidez onetsitako Dirulaguntzen Erregelamenduaren 57. artikuluekin bat etorrira, Bizkaiko Foru Aldundiko Euskara eta Kultura Sailean justifikatu behar dute proiektua egin dela, hura emateko oinarrikoak izan ziren baldintzak bete direla eta diruz lagundutako proiektuaren zenbateko araztuaren gastua jarduerari aplikatu zaio; horretarako agiri hauek aurkeztu beharko dira, 2020ko urtarrilaren 31 (bera barne) baino lehen:
 - a) Diru-laguntza ematerakoan ezarritako baldintzak bete direla justifikatzen duen jarduera-txostena, non egindako ekintzak eta lorturiko emaitzak adieraziko diren.
 - b) Egindako jardueren kostua justifikatzen duen txosten ekonomikoa, honako alderdi hauek jasotzen dituena:
 - 1) Proiektuari egotzitako diru-sarreraren eta gastuen egoera-orria, egoitzan dagoen ereduaren arabera.
 - 2) Gastu-partida bakoitzean, diru-laguntza jaso duen jardueraren gastuen zerrenda sailkatua, egoitzan dagoen ereduaren arabera.
 - 3) Aurreko zenbakian aipatutako zerrendan jasotzen diren fakturak edo merkataritzako trafiko juridikoan froga-balio bera duten edo eraginkortasun administratiboa duten agiriak eta, hala badagokio, ordainketa egiaztatze-ko agiriak.



- 4) Dirulaguntzen, laguntzen, diru-sarreraren edo baliabideen zerrenda zehazta, eta, hala bada, finantzaketa propioarena ere bai, baldin eta horiek finantzatu badute diru-laguntza jaso duen jarduera; xehetasun hori egoitzan dagoen ereduaren arabera egingo da partida bakoitzaren arabera.
- c) Diruz laguntzeko gastuaren aurrekontua justifikatzeko, 2005eko maiatzaren 31ko 5/2005 Foru Arauaren 29.3 artikuluan xedatutakoaren arabera, foru diru-laguntzaren erakunde onuradunak egiaztagiriak aurkeztu behar ditu, gutxienez hiru hornitzailek egin dizkioten eskaintzak justifikatzeko, baldin eta administrazio-kontratazioarako araudian kontratu txikirako ezarritako zenbatekoak gainditzen badira, salbu eta kontratuaren ezaugarri bereziak direla-eta merkatuan ez badago halakorik egin dezakeen erakunde nahikorik edo gastua eskabidea aurkeztu aurretik egin bada.
- Aurkezten diren eskaintzen artean aukeratzeko, efizientzia- eta ekonomia-irizpideen arabera jokatu da. Hala, proposamen ekonomikorik onena aukeratzeko ez denean, beren-beregi justifikatu beharko da inguruabar hori, memoria baten bidez.
- d) Egitaraua gauzatzeko prestatutako esku-egitarau, kartel, argazki, argi-talpen, ikus-entzunezko eta informatikako materialen aleak, baita beste edozein motatako agiri grafikoren aleak ere; haietan, erraz ikusteko eran agertu behar da jarduera horretarako Bizkaiko Foru Aldundiak diru-laguntza eman duela. Horretarako, Bizkaiko Foru Aldundiaren erakunde-elementuak sartuko dira material horietan, foru-dekretu honen 16. oinarriaren e) letran ezarritakoarekin bat etorrita. Betebehar hori laguntza eman zaiela jakinarazi ondoren egindako jarduerari bakarrik dagokie.

16. oinarria. — Diru-laguntzaren onuradunaren beste betebehar batzuk

Onuradunak betebehar hauek ere izango ditu:

- a) Diru-laguntza emateko orduan kontuan hartu den edozein alderdi objektibo edo subjektibok aldatetarik izan badu, horren berri ematea diru-laguntza eman dionari.
- b) Jardueraren hasiera-data eta amaiera-data jakinaraztea diru-laguntza eman dion erakundeari, idatziz. Halaber, diruz lagundutako jarduera kontrolatzeko, haren jarraipena egiteko edo ikuskatzeko eginkizunak edo ahalmenak betetzen laguntzea.
- c) Euskara eta Kulturako Foru Sailari laguntzea, hala eskatzen bazaio, eta kultura arloko edozein informazio ematea (azterlanak, inkestak, datu estatistikoak, etab.).
- d) Euskara eta Kulturako Foru Sailak, Ogasun eta Finantzen Foru Sailak eta Herri Kontuen Euskal Epaitegiak egiten dituzten egiaztapen-jarduerak onartzea.
- e) Diru-laguntza eman ondoren editatutako material guztietan eta jendaurreko agerpen guztietan, Bizkaiko Foru Aldundiaren babesa agerraraztea. Horretarako, Bizkaiko Foru Aldundiaren irudi korporatiboan ezarritako elementuak baliatuko dira, eta logotipoaren aldamenean esaldi hau agertuko da, hitzez hitz:
«Bizkaiko Foru Aldundiak babestutako ekintza / Actividad subvencionada por la Diputación Foral de Bizkaia».
- Euskara hutsean garatutako proiektuetan, gainera, euskararen txantxangorriaren irudia sartu beharko da.
- f) Diruz lagundutako proiektua gauzatzen den bitartean, ez erabiltzea hizkera sexistarik dokumentuetan, ikus-entzunezkoetan eta gisakoetan (idatzizkoetan zein digitaletan), eta pertsoneri buruzko edozein estatistikatan datuak sexuaren arabera bereiz jasotzea, hala ezartzen baitu arlo horretan gorde behar diren printzipio nagusiak jasotzen dituen Emakumeen eta Gizonen berdintasunerako ekainaren 20ko 4/2018 Foru Arauaren 3 artikulua.
- g) Bizkaiko Foru Administrazioak ematen dituen diru-laguntzen araubide juridiko orokorra arautzen duen 2005eko maiatzaren 31ko 5/2005 Foru Arauaren 13. artikuluan eta Bizkaiko Foru Aldundiaren 2010eko martxoaren 23ko 34/2010 Foru



Dekretuaren bidez onetsi den Diru-laguntzen Erregelamenduaren 54. artikuluan eta hurrengoetan ezarritako gainerakoak.

- h) Deialdi honi dagokionez, diru-laguntza foral baten onuradunek bete egin behar dituzte 5/2005 Foru Arauaren 27. artikuluan eta Diru-laguntzen Erregelamenduaren 53. artikuluan azpikontratazioa dela-eta zehazten diren betekizunak eta debekuak. Gehienez ere, diruz lagundutako jardueraren zenbatekoaren %95 azpikontratatu ahal izango dute.

17. oinarria. — Itzulketa

1. Zenbait kasutan itzuli egin beharko dira jasotako diru-laguntza eta dagozkion berandutze-interesak. Hain zuzen ere, hala egin beharko da baldin eta ez badira betetzen aurreko oinarrian edo Foru Administrazioak ematen dituen diru-laguntzen araubide juridiko orokorra arautzen duen 2005eko maiatzaren 31ko 5/2005 Foru Arauaren 33. artikuluan edo Bizkaiko Foru Aldundiaren 2010eko martxoaren 23ko 34/2010 Foru Dekretuaren bidez onetsitako Diru-laguntzen Erregelamenduan jasotako betebeharretariko bat edo batzuk. Besteak beste, honelakorik gertatzen bada itzuli beharko dira:

- a) Justifikatu beharra ez betetzea.
- b) Emandako diru-laguntzaren helburua ez betetzea.
- c) Diru-laguntza justifikatzen ez bada edo foru-dekretu honetan ezarritakoaren arabera nahiko edo behar bezala justifikatzen ez bada, justifikatu ez den diru-laguntzaren zatia eta sortutako berandutze-interesak itzuli beharko dira, Bizkaiko Foru Aldundiko Kultur Ekintzako zerbitzuak horretarako errekerimendua egin ondoren.
- d) Diru-laguntza lortzea nahiz eta horretarako baldintzak bete ez.
- e) Ezarritako kontrol-jarduerak egiten ez uztea, edo horretarako oztopoak jartzea.
- f) Foru dekretu honetan ezarritako gainerako baldintzak ez betetzea.

2. Diru-laguntza jaso duen jardueraren kostua baino finantzaketa gehiago jasotzen bada, diru-laguntza itzuli beharko da.

18. oinarria. — Aurrekontuko partida

1. Deialdi honetako diru-laguntzak emateko 2019. urtean indarrean dagoen aurrekontu muga hau da: Ehun eta hamar mila (110.000) euro, 2019ko ekitaldiko aurrekontuko 2007/0240 gastu-proiektuko 0402 G/232111/45100 aurrekontuko partidaren kargura.

2. Eskabide guztiak ebatzi ondoren, guztira diru-laguntzetarako emandako diru kopurua aurrekontu-muga baino txikiagoa bada, gastu-baimena deuseztatzea tramitatuko da, soberan den zenbatekoan.

AZKEN XEDAPENAK

Azken Xedapenetako Lehenengoa. — Ahalmena ematea

Ahalmena ematen zaio Euskara eta Kulturako foru diputatuari, foru-dekretu honetan xedatutakoa ondoen garatzeko beharrezkoak diren xedapen guztiak eman ditzan.

Azken Xedapenetako Bigarrena. — Indarrean jartzea

Foru dekretu hau Bizkaiko Aldizkari Ofizialean argitaratu eta biharamunean jarriko da indarrean.

Bilbon emana, 2019ko maiatzaren 21ean.

Euskara eta Kulturako foru diputatua,
LOREA BILBAO IBARRA

Ahaldun Nagusia,
UNAI REMENTERIA MAIZ